

დებულება

წევრთა დისციპლინური პასუხისმგებლობისა და დისციპლინური წარმოების შესახებ

თავი 1. ზოგადი დებულებები

მუხლი 1. დებულების რეგულირების სფერო და ფარგლები

წინამდებარე დებულება განსაზღვრავს ბიზნესის რეაბილიტაციისა და გადახდისუნარობის პრაქტიკოსთა ასოციაციის (შემდგომში - „ასოციაციის“) წევრების (შემდგომში - „წევრების“) გადახდისუნარობის პრაქტიკოსებისა და ასოციაციის წევრების ეთიკის კოდექსის (შემდგომში - „კოდექსის“) მოთხოვნათა დარღვევისთვის დისციპლინური პასუხისმგებლობის ზომებს და დისციპლინური საქმისწარმოების წესს.

მუხლი 2. დისციპლინური პასუხისმგებლობის დაკისრების ვადა

კოდექსის მოთხოვნის დარღვევისთვის წევრს არ დაეკისრება დისციპლინური პასუხისმგებლობა, თუ გასულია 3 წელზე მეტი განსახილველი დისციპლინური დარღვევის ჩადენიდან დისციპლინური წარმოების დაწყებამდე. თუ დარღვევა განგრძობადია, ვადა აითვლება მისი დასრულების მომენტიდან.

მუხლი 3. დისციპლინური პასუხისმგებლობის დაკისრების ზოგადი პრინციპები

1. ყოველი დარღვევისთვის წევრის მიმართ შეიძლება დისციპლინური პასუხისმგებლობის მხოლოდ ერთი ზომის გამოყენება.
2. რამდენიმე დარღვევის ერთად განხილვისას გამოიყენება დისციპლინური პასუხისმგებლობის ერთი ზომა.
3. დაუშვებელია უკვე განხილულ საქმეზე წევრის მიმართ იმავე საფუძველით დისციპლინური საქმის აღძვრა.

მუხლი 4. დისციპლინური პასუხისმგებლობის ზომის შერჩევის პრინციპები

წევრისთვის სანქციის დაკისრებისას დისციპლინური კომისია (შემდგომში - „კომისია“) ხელმძღვანელობს პროპორციულობის და თანასწორობის პრინციპებით. კომისია, სხვა გარემოებებთან ერთად, ითვალისწინებს დისციპლინური დარღვევის შინაარსსა და სიმძიმეს, დარღვევების რაოდენობას, დამდგარ ზიანს, მანამდე არსებულ დარღვევებს, წევრის დამოკიდებულებას დარღვევის მიმართ და მის შემდგომ მოქმედებებს დამდგარი ზიანის შესამცირებლად.

მუხლი 5. დისციპლინური საქმისწარმოების ეტაპები

დისციპლინური საქმისწარმოება შედგება მოკვლევისა და განხილვის ეტაპებისგან. მოკვლევის ეტაპზე წევრის მიმართ დისციპლინური დევნის აღძვრა წინაპირობაა საქმის განხილვის ეტაპზე გადასაცემად.

მუხლი 6. დისციპლინური საქმისწარმოების კონფიდენციალურობა

1. დისციპლინური საქმისწარმოების ყველა ეტაპი კონფიდენციალურია. კომისიის წევრებმა არ უნდა გაასაჯაროონ ინფორმაცია საქმის გარმოებათა შესახებ და უნდა დაიცვან

თათბირის საიდუმლოება.

2. დისციპლინური საქმისწარმოების დასრულების შემდეგ კომისიის გადაწყვეტილება, გარდა სანქციად კონფიდენციალური რეკომენდაციის გამოყენების შემთხვევისა, ქვეყნდება საქართველოს წევრთა ასოციაციის ვებგვერდზე კომისიის გადაწყვეტილების წევრისთვის ჩაბარებიდან 1 თვის გასვლის შემდეგ. გამოქვეყნებული ინფორმაცია ასოციაციის ვებგვერდზე განთავსებული იქნება დისციპლინური სახდელის გაქარწყლებამდე.
3. კომისიამ გადაწყვეტილება უნდა გამოაქვეყნოს იმ მოცულობით, რომ არ დაირღვეს რომელიმე საწევრაჟო პროცესის კონფიდენციალურობა.

თავი 2. საქმის მოკვლევა

მუხლი 7. მომკვლევი

1. წევრის მიმართ დისციპლინურ მოკვლევას ამ თავით გათვალისწინებული წესით ახორციელებს მომკვლევი.
2. გამგეობის თითოეული წევრი 6 თვის განმავლობაში შეასრულებს მომკვლევის ფუნქციას. გამგეობის წევრი ითვლება დანიშნულად როტაციის პრინციპის საფუძველზე ანბანის მიხედვით გამგეობის არჩევის შემდეგ, ან თუ წინამდებარე დებულების ძალაში შევლის დროისათვის გამგეობა უკვე არჩეულია - დებულების დამტკიცების შემდეგ.
3. მომკვლევი ანგარიშვალდებულია გამგეობის წინაშე.
4. გამგეობა მოკვლეულ საქმეებზე ანგარიშს მომკვლევის ინფორმაციის საფუძველზე აბარებს საერთო კრებას ყოველწლიურად. ანგარიშში ასევე უნდა მიეთითოს ინფორმაცია (ასეთის არსებობის შემთხვევაში) მომკვლევის საქმიდან აცილების, ასევე მომკვლევის ვადამდე გათავისუფლების საფუძველების შესახებ.

მუხლი 8. მოკვლევის დაწყება

1. მოკვლევის დაწყების საფუძველებია:
 - ა) პირის განცხადება წევრის მიერ დისციპლინური დარღვევის სავარაუდო ჩადენის თაობაზე, გარდა ანონიმური განცხადებისა;
 - ბ) საჯაროდ გავრცელებული ან სხვაგვარად მიღებული ინფორმაცია წევრის მიერ დისციპლინური დარღვევის სავარაუდო ჩადენის თაობაზე.
2. განცხადების წარდგენის შემთხვევაში მომკვლევი შეისწავლის წარმოდგენილ ან მოპოვებულ მტკიცებულებებს და იღებს გადაწყვეტილებას წევრის მიმართ დისციპლინური დევნის აღძვრის ან არაღძვრის თაობაზე.
3. თუ მომკვლევი მიიჩნევს, რომ საჯაროდ გავრცელებული ან სხვაგვარად მიღებული ინფორმაცია წევრის მიმართ მოკვლევის დაწყების საფუძველია, ის იწყებს მოკვლევას, რაზეც წერილობით აცნობებს კომისიის თავმჯდომარეს.

მუხლი 9. მომკვლევის აცილება

მომკვლევის მიმართ ამ დებულების მე-16 მუხლით განსაზღვრული წინაპირობების არსებობა არის მისი აცილებისა და მომკვლევადა სხვა პირის გამწესების საფუძველი. ზემოაღნიშნულ გადაწყვეტილებას იღებს ასოციაციის თავმჯდომარე მხარის შუამდგომლობის ან მომკვლევის თვითაცილების საფუძველზე.

მუხლი 10. მოკვლევის განხორციელება

1. საქმის მოკვლევის მიზნით მომკვლევნი უფლებამოსილია:

- ა) გამოკითხოს განცხადების წარმდგენნი პირნი და შესთავაზოს მას მტკიცებულებათა მიწოდება;
- ბ) დამოუკიდებლად მოიპოვოს მტკიცებულებები;
- გ) გამოკითხოს მოწმეები, მათ შორის, ასოციაციის სხვა წევრები ან დამხმარე პერსონალი;
- დ) გამოკითხოს წევრი, რომელთან დაკავშირებითაც წარმოებს მოკვლევა.

2. მომკვლევნი აღრიცხავს და საქმეში დებს მის მიერ წარმოებული საქმის მასალებს (მტკიცებულებებს და გამოკითხვების ოქმებს ან/და აუდიო ჩანაწერებს).

მუხლი 11. საქმეთა გაერთიანება

ერთი და იმავე წევრის წინააღმდეგ რამდენიმე განცხადების წარდგენის შემთხვევაში დისციპლინური კომისიის თავმჯდომარე უფლებამოსილია ისინი ერთ წარმოებად გააერთიანოს.

მუხლი 12. მოკვლევის ვადა

დისციპლინური საქმის მოკვლევის ვადა არ უნდა აღემატებოდეს 2 თვეს. მომკვლევს შეუძლია გააგრძელოს ეს ვადა არაუმეტეს იმავე ვადით. ვადის გაგრძელების შესახებ მომკვლევის გადაწყვეტილება უნდა იყოს დასაბუთებული.

მუხლი 13. მოკვლევის შედეგი

- 1. წევრის მიმართ დისციპლინური დევნა აღიძვრება, თუ საქმეში წარმოდგენილი გარემოებები და მტკიცებულებები წარმოშობს დასაბუთებულ ვარაუდს წევრის მიერ კოდექსის მოთხოვნათა დარღვევაზე.
- 2. წინა პუნქტში განსაზღვრული პირობების არარსებობის შემთხვევაში დევნა არ აღიძვრება და საქმის მოკვლევა წყდება.

მუხლი 14. დისციპლინური დევნის დასაბუთებულობა

მომკვლევის მიერ დისციპლინური დევნის დაწყებისა და მოკვლევის შეწყვეტის შესახებ გადაწყვეტილებები უნდა იყოს დასაბუთებული და ხელმოწერილი.

თავი 3. დისციპლინური განხილვა

მუხლი 15. საქმის განხილვის დაწყება

- 1. დისციპლინური დევნის აღძვრის გადაწყვეტილების მიღებიდან 7 კალენდარული დღის ვადაში მომკვლევნი საქმეს გადასცემს დისციპლინურ კომისიას.
- 2. დისციპლინური კომისია დისციპლინური დევნის აღძვრის შესახებ აცნობებს წევრს და აწვდის დისციპლინური დევნის დაწყების გადაწყვეტილებას და საქმის სხვა მასალებს.

მუხლი 16. დისციპლინური კომისია. დისციპლინურ განხილვაში მონაწილეობის დაუშვებლობა

1. დისციპლინური კომისია შედგება 5 წევრისაგან, რომელსაც ასოციაციის წევრებიდან ირჩევს ასოციაციის საერთო კრება 3 წლის ვადით. თუ წინამდებარე დებულების ძალაში შევლის დროისათვის გამგეობა უკვე არჩეულია - პირველი დისციპლინური კომისია აირჩევა გამგეობის უფლებამოსილების ვადით. დაუშვებელია, დისციპლინური კომისიის წევრი იმავდროულად იყოს გამგეობის წევრი.
2. დისციპლინურ განხილვაში არ შეიძლება მონაწილეობდეს კომისიის წევრი, თუ:
 - ა) განცხადების ავტორია;
 - ბ) დისციპლინურ წარმოებაში მონაწილე პირის ახლო ნათესავია. ამ დებულების მიზნებისთვის ახლო ნათესავად მიიჩნევა კანონისმიერი მემკვიდრე;
 - გ) სახელმწიფო ურთიერთობაშია წევრთან, რომლის მიმართაც აღძრულია დისციპლინური დევნა;
 - დ) სხვა გარემოებათა გამო არსებობს დასაბუთებული ეჭვი მის მიუკერძოებლობასთან დაკავშირებით.
3. კომისიის წევრი ვალდებულია თვითაცილება განაცხადოს ამ მუხლის პირველი პუნქტით აღნიშნული რომელიმე გარემოების არსებობისას.
4. აცილების შესახებ განცხადებას განიხილავს კომისია და გადაწყვეტილებას იღებს დამსწრე წევრების ხმათა უმრავლესობით.
5. აცილების საკითხის განხილვისას კომისიის ის წევრი, რომლის მიმართაც დასმულია აცილების შუამდგომლობა, არ მონაწილეობს კენჭისყრაში, გარდა იმ შემთხვევისა, როდესაც აცილება დასმულია კომისიის წევრთა ნახევარზე მეტის მიმართ

მუხლი 17. დისციპლინური განხილვის გადაწყვეტილების მიღების ვადა

დისციპლინურმა კომისიამ საქმეზე გადაწყვეტილება უნდა მიიღოს დისციპლინური დევნის აღძვრის შესახებ გადაწყვეტილების მისთვის გადაცემიდან 2 თვის ვადაში. კომისიის თავმჯდომარეს შეუძლია დასაბუთებული გადაწყვეტილებით ეს ვადა გააგრძელოს არაუმეტეს 2 თვით.

მუხლი 18. შეტყობინებების გაგზავნის წესი

1. წევრს ეცნობება დისციპლინური კომისიის სხდომის დრო და ადგილი. წევრს შეტყობინება უნდა ჩაბარდეს სხდომამდე არანაკლებ 7 კალენდარული დღით ადრე.
2. წევრისა და დისციპლინური წარმოების მონაწილე სხვა პირების დაბარება შესაძლებელია ფოსტით, ტელეფონით, ელექტრონული ფოსტით, ფაქსით ან სხვა ტექნიკური საშუალებით, რომელიც იძლევა კომუნიკაციის განხორციელების მტკიცებულების შექმნის შესაძლებლობას.
3. შეტყობინება წევრს ბარდება ასოციაციის მონაცემთა ბაზაში არსებულ წევრის მისამართზე, ელექტრონულ ფოსტაზე ან ტელეფონზე. შეტყობინება ჩაბარებულად ჩაითვლება, თუნდაც წევრი აღარ იმყოფებოდეს ამ მისამართზე ან მან უარი განაცხადოს შეტყობინების ჩაბარებაზე.

მუხლი 19. დისციპლინური განხილვის მხარეები

1. დისციპლინური განხილვის მხარეები არიან ასოციაცია და წევრი, რომლის მიმართაც აღძრულია დევნა.
2. ასოციაციას დისციპლინურ განხილვაში წარმოადგენს მომკვლევია.

მუხლი 20. დისციპლინური წარმოების განხილვის ფორმა

1. დისციპლინური განხილვა ტარდება მხარეთა ზეპირი მოსმენით. წევრის შუამდგომლობით შესაძლებელია განხილვა ჩატარდეს ზეპირი მოსმენის გარეშე.
2. დისციპლინური კომისია იღებს ზომებს საქმის ზეპირი განხილვისთვის მოსამზადებლად; ამისათვის მხარეებს განუსაზღვრავს პოზიციების და მტკიცებულებების წარმოსადგენად ვადებს და განსაზღვრავს სხვა საპროცესო საკითხებს.

მუხლი 21. დისციპლინური განხილვის პრინციპები

დისციპლინური განხილვა წარიმართება შეჯიბრებითობისა და მხარეთა თანასწორობის პრინციპების საფუძველზე.

მუხლი 22. მხარეთა უფლებები

დისციპლინური განხილვისას მხარეებს უფლება აქვთ გაეცნონ საქმის მასალებს, გადაიღონ ასლები, განაცხადონ აცილებანი, წარადგინონ მტკიცებულებანი, მონაწილეობა მიიღონ მტკიცებულებათა გამოკვლევაში, შეკითხვები დაუსვან მოწმეებსა და ექსპერტებს, განაცხადონ შუამდგომლობები, წარადგინონ ზეპირი და წერილობითი განმარტებები, გამოთქვან მოსაზრებები საქმის განხილვის დროს წამოჭრილ ყველა საკითხზე, მათ შორის, იმ საკითხებზე, რომლებზეც დისციპლინური კომისია მიუთითებს, უარყონ მეორე მხარის შუამდგომლობები და მოსაზრებები და ისარგებლონ ამ დებულებით მათთვის მინიჭებული სხვა უფლებებით.

მუხლი 23. დისციპლინური კომისიის სხდომა

1. დისციპლინური კომისიის თავმჯდომარე ხსნის სხდომას, აცხადებს დისციპლინური კომისიის შემადგენლობას და განსახილველ დისციპლინურ საქმეს.
2. დისციპლინური კომისიის თავმჯდომარეს შეუძლია მისი არყოფნის ან სხვა მიზეზის გამო სხდომის ხელმძღვანელობა გადასცეს კომისიის სხვა წევრს, რაც მოიცავს საქმის განხილვასთან და მასზე გადაწყვეტილების მიღებასთან დაკავშირებული თავმჯდომარის უფლებამოსილების გადაცემას.
3. დისციპლინური კომისიის წევრებს ეცნობება სხდომაზე გამოცხადებულ პირთა ვინაობა. თუ მხარე არ გამოცხადდა სხდომაზე, კომისია განიხილავს მხარის გამოუცხადებლობასთან დაკავშირებულ საკითხებს.
4. დისციპლინური კომისიის თავმჯდომარე მხარეებს განუმარტავს კომისიის წევრის აცილების, შუამდგომლობებისა და დამატებითი მტკიცებულებების წარმოდგენის უფლებას.
5. დისციპლინური კომისია მოსმენს მხარეთა პოზიციებს და მათ პასუხებს დისციპლინური კომისიის მიერ დასმულ შეკითხვებზე.
6. მხარეთა პოზიციების მოსმენის შემდეგ, დისციპლინური კომისია მხარის შუამდგომლობით ან თავისი ინიციატივით შეამოწმებს სადავო ფაქტებთან დაკავშირებულ მტკიცებულებებს.
7. საქმეში არსებულ გარემოებათა გამოკვლევის მიზნით დისციპლინური კომისია უსმენს სხდომაზე მოწვეულ მოწმეებსა და ექსპერტებს და მხარეებს აძლევს მათთვის შეკითხვების დასმის საშუალებას.
8. თუ მხარის მიერ დასმული შეკითხვა შეუფერებელია და არ ემსახურება საქმის გარემოებათა გამოკვლევას, კომისიის თავმჯდომარეს შეუძლია მოხსნას ის თავისი ინიციატივით ან მეორე მხარის შუამდგომლობის საფუძველზე.

9. დისციპლინური კომისიის სხდომის ბოლოს მხარეებს უფლება აქვთ გამოვიდნენ შემაჯამებელი სიტყვით, დასასრულს შემაჯამებელ სიტყვას წარმოთქვამს წევრი, რის შემდეგაც ზეპირი მოსმენა დასრულებულად ცხადდება.
10. თუ კომისია სხვაგვარ გადაწყვეტილებას არ მიიღებს, დისციპლინური განხილვა ჩაითვლება დასრულებულად დისციპლინური განხილვის სხდომის დასრულებით. განხილვის დასრულების შემდეგ კომისია მხარეთა დამატებით პოზიციებს და მტკიცებულებებს არ მიიღებს.

მუხლი 24. დისციპლინური განხილვის სხდომის ოქმი

1. დისციპლინური განხილვის სხდომის ოქმი იწარმოება აუდიოჩანაწერის ან სხვა ტექნიკური საშუალების გამოყენებით.
2. სხდომის ოქმი დაერთვის დისციპლინური კომისიის გადაწყვეტილებას.

მუხლი 25. გადაწყვეტილების მიღების უფლებამოსილება

დისციპლინური კომისია გადაწყვეტილება უნარიანია, თუ მას ესწრება სრული შემადგენლობის ნახევარზე მეტი. გადაწყვეტილება მიიღება დამსწრეთა უმრავლესობით, მაგრამ არანაკლებ კომისიის სრული შემადგენლობის მესამედისა. ასოციაციის წევრობის შეჩერების ან ასოციაციიდან გარიცხვის გადაწყვეტილება მიიღება სრული შემადგენლობის უმრავლესობით. ხმათა თანაბრად გაყოფის შემთხვევაში გადამწყვეტია დისციპლინური კომისიის თავმჯდომარის ხმა.

მუხლი 26. დისციპლინური კომისიის გადაწყვეტილება

1. დისციპლინური კომისიას გადაწყვეტილება გამოაქვს ასოციაციის სახელით.
2. დისციპლინური კომისიის გადაწყვეტილება შედგება შესავალი, აღწერილობითი, სამოტივაციო და სარეზოლუციო ნაწილებისაგან:
 - ა) შესავალ ნაწილში აღინიშნება გადაწყვეტილების მიღების დრო და ადგილი, გადაწყვეტილების მიმღები ორგანოს დასახელება და კომისიის შემადგენლობა, დისციპლინური დევნის აღმძვრელი წევრისა და წევრის ვინაობა;
 - ბ) გადაწყვეტილების აღწერილობით ნაწილში უნდა აღინიშნოს დისციპლინური საქმისწარმოების ისტორია, დევნის აღმძვრელის წევრისა და წევრის პოზიციები;
 - გ) გადაწყვეტილების სამოტივაციო ნაწილში უნდა აღინიშნოს დადგენილი ფაქტობრივი გარემოებები და მტკიცებულებები, რომლებსაც ემყარება ეს დასკვნები, აგრეთვე, ის დებულებები, რომლებითაც იხელმძღვანელა დისციპლინურმა კომისიამ;
 - დ) გადაწყვეტილების სარეზოლუციო ნაწილი უნდა შეიცავდეს დასკვნას წევრის გამართლების ან მის მიერ კოდექსის დარღვევის შესახებ. დარღვევის დადგენის შემთხვევაში სარეზოლუციო ნაწილში მიეთითება წევრისთვის დაკისრებული დისციპლინური პასუხისმგებლობის სახე, აგრეთვე გადაწყვეტილების გასაჩივრების ვადა და წესი.
3. განხილვის მონაწილე დისციპლინური კომისიის წევრი ვალდებულია ხელი მოაწეროს კომისიის გადაწყვეტილებას. კომისიის რომელიმე წევრის მიერ გადაწყვეტილებაზე ხელმოწერისაგან თავის შეკავება ასევე მიეთითება გადაწყვეტილებაში. წევრის განსხვავებული აზრი დაერთვის გადაწყვეტილებას.

მუხლი 27. დისციპლინური წარმოების ხარჯები

ასოციაცია ფარავს დისციპლინური წარმოების ხარჯებს, გარდა წევრის ინიციატივით ადვოკატის, თარჯიმნის, სპეციალისტისა და მოწმის მოწვევასთან დაკავშირებული და სხვა ხარჯებისა, რომლებსაც ფარავს წევრი.

მუხლი 28. გადაწყვეტილების გაგზავნა წევრისთვის

კომისიის დასაბუთებული გადაწყვეტილება უნდა მომზადდეს და გაეგზავნოს მხარეებს, ასევე განმცხადებელს თუკი წარმოება პირის განცხადების საფუძველზე დაიწყო, კომისიის მიერ განხილვის დასრულებიდან 30 კალენდარული დღის ვადაში.

მუხლი 29. დისციპლინური წარმოების შეჩერება

1. დისციპლინურ კომისიას უფლება აქვს შეაჩეროს დისციპლინური განხილვა, თუ:
 - ა) წარმოიშვა ობიექტური სირთულე, რის გამოც შეუძლებელია დისციპლინური წარმოების გაგრძელება;
 - ბ) იმავე წევრის მიმართ დისციპლინური კომისიის წარმოებაშია დისციპლინური საქმე, რომლის განხილვის შედეგაც შეიძლება გავლენა იქონიოს კომისიის გადაწყვეტილებაზე.
2. დისციპლინური წარმოების შეჩერების ვადა არ ჩაითვლება ამ დებულებით განსაზღვრულ დისციპლინური წარმოების ვადებში.
3. იმ შემთხვევაში, თუ წევრს დისციპლინური წარმოების დაწყების შემდეგ შეუწყდება ასოციაციის წევრობა, დისციპლინური წარმოება დასრულდება, ხოლო სანქციის აღსრულება გადავადდება წევრის მიერ წევრობის აღდგენამდე.
4. იმ შემთხვევაში, თუ წევრი დისციპლინური წარმოების დაწყებისას ან კომისიის მიერ გადაწყვეტილების მიღებისას აღარ არის ასოციაციის წევრი, კომისიის მიერ მიღებული გადაწყვეტილება ექვემდებარება გამოქვეყნებას ამ დებულების მე-6 მუხლის შესაბამისად, კომისიის გადაწყვეტილება გათვალისწინებული იქნება წევრის მიერ ასოციაციის წევრობის სურვილის შემთხვევაში განაცხადის განხილვისას.

მუხლი 30. დისციპლინური წარმოების შეწყვეტა

1. დისციპლინური კომისია იღებს გადაწყვეტილებას დისციპლინური წარმოების შეწყვეტის შესახებ იმ შემთხვევაში, თუ დადგინდება, რომ განცხადების შეტანის თარიღამდე გასული იყო ამ დებულებით დადგენილი ვადა ან არსებობს წარმოების შეწყვეტის სხვა კანონისმიერი საფუძველი. დისციპლინური წარმოების შეწყვეტაზე დასაბუთებულად შუამდგომლობს მომკვლევნი.
2. განცხადების ავტორის უარი განცხადებაზე არ არის დისციპლინური დევნის შეწყვეტის საფუძველი.

თავი 4. დისციპლინური სანქციები

მუხლი 31. ეთიკის კოდექსის დარღვევისთვის დადგენილი სანქციები

კოდექსის დარღვევის შემთხვევაში წევრის მიმართ გამოიყენება შემდეგი სანქციები:

- ა) კონფიდენციალური რეკომენდაცია;

- ბ) საჯარო გაფრთხილება;
- გ) წევრობის შეჩერება 3 წლამდე ვადით;
- დ) ასოციაციიდან გარიცხვა 3 წლის შემდეგ ხელახლა მიმართვის უფლებით;
- ე) ასოციაციიდან გარიცხვა ხელახლა მიმართვის უფლების გარეშე.

მუხლი 32. დისციპლინური სანქციის გაქარწყლება

ამ დებულების 31-ე მუხლის „ა“ და „ბ“ ქვეპუნქტებით გათვალისწინებული დისციპლინური სანქციები გაქარწყლდება სანქციის დაკისრებიდან 1 წლის თავზე, ხოლო „გ“ და „დ“ ქვეპუნქტებით გათვალისწინებული სანქციები - წევრობის აღდგენიდან 2 წლის შემდეგ. გაქარწყლების შემდეგ წევრის მიერ განმეორებით ჩადენილი დისციპლინური დარღვევის გამო დისციპლინური სანქციის დაკისრებისას მხედველობაში არ მიიღება გაქარწყლებული დისციპლინური სანქცია.

თავი 5. გასაჩივრებისა და აღსრულების წესი

მუხლი 33. წევრის გამამართლებელი გადაწყვეტილების გასაჩივრება

წევრის მიმართ გამოტანილი გამამართლებელი გადაწყვეტილება საბოლოოა.

მუხლი 34. წევრის გამამტყუნებელი გადაწყვეტილების გასაჩივრება

დისციპლინური კომისიის გადაწყვეტილება წევრისთვის დისციპლინური პასუხისმგებლობის დაკისრების თაობაზე შეიძლება გასაჩივრდეს სასამართლოში.

მუხლი 35. გადაწყვეტილების აღსრულება

დისციპლინური კომისიის გადაწყვეტილებას, თუ ის ითვალისწინებს საჯარო გაფრთხილებას, ასოციაციის წევრობის შეჩერებას ან ასოციაციიდან გარიცხვას, აღსრულებს ასოციაციის მმართველი ორგანო გადაწყვეტილების წევრისთვის ჩაბარებიდან 1 თვის გასვლის შემდეგ.

თავი 6. დასკვნითი დებულებები

მუხლი 36. დებულების გამოქვეყნება

დებულება მისი მიღებიდან 3 კალენდარული დღის ვადაში განთავსდეს ასოციაციის ვებგვერდზე.

მუხლი 37. დებულების ამოქმედება

1. დებულება ამოქმედდეს 2023 წლის 16 თებერვლიდან.